

Job

Pariverena

Rava jijimanina tagogi vinuabola apoapoei mağamağau i nenelağai lamna au bukana e vivirarautuei. Job ana nota ma ana rava ai nota wei nuabolai awari lamna e viviatataieta. Ana rava e notanotai da Job kaua apoapoei i kauei aubaina God, tauna e kovokovoğī. Job i aramanei da wei eğā riwa kaua. Tauna, God i vivitumağanei, wate i góeğoei da ita aramanei aiwai aubaina wei nuabolana e tuputupua. God, Job ana vinuapoapoe anona eğā ita vieğei, wate God ana rewapanma ana nuaulaula i rata guratana au baina rava eğā tagotagogina da ina aramanei aiwai e viviatataieta. Maranai i aramanei da God ana rewapanma ana nuaulaula i rata guratana, tauna God vitaraviravirana i voterei ma i voepaepai. Wei viraraantuana au damona God Job i vilawani ma natunatuna i vimağai ma i vimaura-melei. God Job ana rava tonuğā i ena-guratei aubaina tauieğā ita aramana-kauei aiwai i latolatoni ma Job i vinuapoapoe.

Job ana virarautua

¹ Oroto wavana Job au Uz i mae. Tauna rava jijimana kaukauana ma gó'apoapoei i geduaiei. Tauna God i vivirei ma góa aiaii ava i kaukauei. ² Tauna natunatuna nelarai 7 ma waivinei tonuğā, ³ ma ana sipu 7,000; kamel 3,000; uata bullna 1,000 ma donkey waivinei 500 ma ana taunola

mağamağau. Ma i vipurapura ma i maura kaua eğä aiai ġelauna nanare nai au dobuna, au maramatanei.

⁴ Ai mara i tereterei nanare Job natunatuna nelarai nununai ai au numa i toretorela, ma varevarei ma novunovui i rauğoreiai ma anatapui i amam ma i umauma gogona. ⁵ Aupom biağā nanare torela au murina, Job ubaubanai boibogī ina vovomairi ma natunatuna nununai ina rauğoreiai ma epaiai ġamoğamo taputapuna ina apuapui BADA awarina da natunatuna ina viaiaini. Tauna i notanota da, “Mepa da roaroa i kauana-boai ma au orai God i parivaiapoapoeni.”

Satan Job ana tumağana i raudadani

⁶ Marina mara i ġetai da anela au mara i ġeta BADA awarina ma tauviwavu - Satan taui i votağoi da i ġeta. ⁷ BADA Satan i paridadanei, “Tam meiei e nenei?”

Satan i paribelei i pa, “Tau were ma nare a nenaе ma a nenei, dobu a tetetei.”

⁸ Ma BADA i paridadana, “Au taunola Job u inanai bo eğä? Tauna rava aiaii kaukauana, eğä aiai ġelauna au dobu nanare. Tauna rava jijimanina ma patupatutuna. E vivivireiu ma e paipaina-melei da eğä kaua apoapoe ita kaukuae.”

⁹ Satan i paribelei, “Tam Job e paipaina-kauei lamna aubaina e voepaepaim! ¹⁰ Marana patapatai tauna ana numa ravai ma ana purapura e gagagaloei, ma anatapuna uranei e vovodadani e viaiaini, ma bulumakau u verei da wapuna i oai. ¹¹ Wate uram ma viloloi ma

anatapuna ġarinei ma vaitawanei, ma au matam ina parivai apoapoenim.”

¹² BADA i riwa i pa, “Anina, ana purapura anatapuna au uram a tereterei, wate eġa tupuana aiwaina ma vodadani.” Ma Satan BADA i netawanei.

¹³ Mara tagogi, Job natunatuna nelarai ma waivinei i toretorela, tuai ana au numa, ¹⁴ ma taupariverena i ġeta Job awarina ma i riwei i pa, “Am taunola burumakauei doa i uauatai ma au ġereġerei donkey modu i amam, ¹⁵ ma mai Sabea i ruba-ġairai ma ġamoġamo anatapui i kwalei, am taunola anatapui i viraġena-naiei, ma tau ainelau a ruba da ata pariverem.”

¹⁶ I bababani ma taupariverena ġelauna i ġetai ma i riwa, “Namanamara marei i ġairai da sипу ma taupainii i viraġena-pai, ma tau ainelau a rubai da ata paripariverem!”

¹⁷ Ravana i bababani ma taupariverena ġelauna i ruba ġetai ma i riwa, “Mai Caldia boru tonuġa ana melaġina i ġairai ma am kamel i viaġaġana-naiei ma taupainii i viraġena-pai, tau ainelau a ruba da ata paripariverem!”

¹⁸ Amapo i bababani ma wate taupariverena ġelauna i ruba ġetai ma i riwa, “Natunatum nelarai ma waivinei, natuevou ana au numa i toretorela, ¹⁹ ma maratagogi kojikojira mutuluei i opui ma numa i vipeuni au tepai ma anatapui i viaijiji, tau ainelau a ruba da ata pariverem!”

²⁰ Anina ma Job i vomairi ma ana kwama i sikai. Kolana i ġari ma i peu ġaira au doa ma BADA i voepaepai. ²¹ Ma i riwa,
“Ana kovakovau a nei;
ana kovakovau ana nae.

BADA i verena ma i vai-melei;

BADA wavana ana voepaepai ma ana vibo-rumei.”

²² Wei anatapuna au orana, Job eāgā gō'apoapoe aiwaina ita kaeui bo God ita viwavui.

2

Satan Job i raudadana-melei

¹ Mara ġelauna, anela au mara i ġeta me, BADA awarina ma tauviwavuna - Satan taui i votaġoi.

² Ma BADA Satan i paridadanei, “Tam meiei e nenei?”

Satan i paribelei i pa, “Tau were ma nare a nena e ma a nenei, dobu a tetetei.”

³ Ma BADA i paridadana, “Au taunola Job u inanai bo eāga? Tauna rava aiaii kaukauana eāga aiai ġelauna au dobu nanare. Tauna rava jijimanina ma patupatutuna. Ma e vivivireiu ma gō'apoapoe e gedugedaiei. Ana lawana anina jijimanina e maemaeni avena da orau u taini da a kovoġa labalababai.”

⁴ Tauviwavu BADA i paribelei, “Tauna ana lawana ava e vinuabolei, me rava ana purapura anatapuna ina verenei da eāga ina kero. ⁵ Wate uram ma viloloi ma tupuana ma ġelamina ma ravi, ma au matam ina parivai-apoapoenim!”

⁶ BADA i riwei, “Anina, tauna au uram a tereterei wate eāga ma viraġeni.”

⁷ Ma Satan BADA i netawanei ma i nae da Job kero apoapoei i verei, au loulouna da i ġaira au ae lapalapana. ⁸ Ma Job nau gebona i vaia da kerona i kakakaroi ma au lapukare i kiakiala.

⁹ Awana Job i riwei i pa, “Amapo da am lawana jijimanina ma vovojijini bo? God ma parivaiapoapoeni ma ma irāge!”

¹⁰ Wate Job i paribelei i pa, “Tam opaopam! Eāga nanare ma babani. Tauta God kaua mağamağau ma aiaii e verevereta, ma apoapoei e paripari-tawaneiai, maiteni tana vaia.”

Wei kauai mağamağau apoapoe Job awarina i tupua, wate tauna ana babani awarinei eāga ġo'apoapoe ita kauei.

Job ana rava i nei da i raugenari

¹¹ Maranai ana rava tonuġa riwana i vaia da Job wenanare ma menanare i vinu'apoapoeni, taui i vitagogiei ma i nae Job ita raugenari ma ita vinuaubai. Taui wavai Eliphas tauna Temanei, Bildad tauna Shuahei ma Zophar tauna Naamah ei. ¹² Taui tapunei Job i 'nanai ma i vinuanainei da lamna Job. Maranai i 'nana-kauei. Taui i vitouana, ma ai kwama i viaisikasikai ma pokau au tepai i tawatawanei. ¹³ Ma aupom ma waguvvarai 7 taui au doa i vikiakialei, Job i mae-vererei. Ma i 'nanai da ana nuabola i rata guratana ma gamoi i pota ma i kiala genuatau.

3

Job ana tupua marana i parivaiapoapoeni.

¹ Wiki tagogi au murina Job gamona i laġi ma ana tupua marana i parivaiapoapoeni. ² I pa,

³ Au tupua marana ma boai,

ma waguvvaraina i vinolanola da tevera oroton a i tupua.

- 4** Nai marana ina waguvarei!
 Ma God au aidamo wei marana ina nota-tawanei,
 ma au tepana ega ina rarana.
- 5** Waguvara ma gimtona potopotona wei marana
 ina vibadei;
 ma lada marana ina purui
 ma gimtona lalalaina ina purui.
- 6** Gimtona nai waguvaraina ina viamoai
 wei marana ega ma iava-melei;
 madegana bo nawaravina.
- 7** Nai waguvaraina ega aiai ina tupua,
 ma ega nuaiai gararana ina nonori.
- 8** Vijiboغا amamai,
 mepa da ai vijiboغا boga bariawana
 ina vidogui;
 taui wei marana ina vijibogi.
- 9** Maratomtom ubonana ina guvai
 ma mara karena ina paina-avei
 ma madega vuduna ega ina inanai.
- 10** Aubaina taui manawa metaetana ega ita gudu
 ma vita magamaagaui i vereu.
- 11** Airake, boibogi ita gomuiu!
 Bo ata i 'rage maranai a tuputupua.
- 12** Aiwai aubaina au arona i vimataveniu
 ma gugunei i viuguguiu?
- 13** Maranaina a tupua, matau ita pota;
 ma ata matave ma ata vilauvitau.

- ¹ Ma Eliphas rava Temanei Job i paribelei i pa,
² Job ega amlom ina gai-gai ma ana babani,
 tau ata genuana ava, ana babani!
³ Rava ma-gama-gau u viararamani
 ma gokokokarai u vovaivirewapani.
⁴ Riwam, rava peupeui u dugui,
 ma ae tutui viviarai u dugui.
⁵ Wate marina nuabola i nei awarim, ma am nota
 i peu
 i vodadanim ma u rovo-kaua.
⁶ Am vituma-gana God awarina,
 ma am lawana jijimanina.
 Lamna, am rewapania, tapa?

⁷ Ma tumairi ma ma vinua notanota!
 Rava jijimani e iraira-ge bo?
 Mara aiwai rava jijimani i kero ma i'-ra-ge?
⁸ A inanai rava goa apoapoe i paewi
 ma nuabola i tuarui.
*Job ana rava amapo da i ririwa-giri-giri da tauna
 kaua apoapoei i kaei aubaina wei nuabolana
 e nenela-gai. Wate Job e ririwa da tauna ega aiwai
 apoapoenia ita kaei.*

38

BADA Job i paribelei

- ¹ Ma BADA labu au orana ma Job i paribelei, i pa,
² “Tam aiai e bababani labalababa,
 ma au nuaulaula e paripari-virevirei?
³ Ma mairi jijimana me oroto,
 ana vitaravirevirem
 ma ma paribelevu!

- ⁴ Tam mepa maranai dobu tuatuana i tonei?
 Ma riweu, mepa da u aramanei?
- ⁵ Aiai dobu ana manawa ma ana dabora i terei?
 U aramanei tapa? Ma aiai i ruvai?
- ⁶ Aiwai dobu tuatuana e vovojijini?
 Ma aiai dobu tuatuana i tonei,
- ⁷ maranai maratomtom ubonai i wela tagogi,
 ma BADA ana anela ana morelanai i voepaepa
 ma i vigaragaraei?
- ⁸ Aiai boga ana au parata i terei
 maranai boga manawana ana goba
 i wanaiwaġi?”

40

- ¹ Ma BADA Job i riwei i pa,
² “Tam, God Vivirewapano Kaukauana
 e viviwavui;
 Aiai God e viviwavui, ina paribelei.”
- ³ Anina ma Job BADA i paribelei,
⁴ “Tau rava labalababa, menanare
 ana paribelananem?
 Gamou ina pota.
- ⁵ Boibogī a babani guratana.
 Ega aiwai ġelauna ana latoni.”

42

- Job i babani me*
- ¹ Ma Job i babani me, i pa
² “Tau a aramanei da tam aiwai anatapuna
 e kaukauei;

Eēga aiai am ogā ina viīgæi.

³ ✖U paridadaneu, ‘Tam aiai e bababani labalababa,
ma au nuaulaula e pari-virevirei?’

Riwa kaua am boruma vivinualaulaunana
eēga ata aramanei,
da a voīgana guratana.’

⁴ ✖“U riweu, ‘Ma rautaniīgana, ma ana babani,
Ana paridadanem ma tam ma paribeieu.’

⁵ Taniīgau ava riwam i nonori
Wate marina matau i ’nanaim.

⁶ A vinimala, ma au lapukare ma au debidebi
ana kiala.

A ruperupena ma a mae-tavireu awarim ma au
go’apoapoe ma nota-tawanei.”

Damona

⁷ BADA i babani vorovei Job awarina ma marina Eliphas rava Temanei awarina ina pa, “Am-lou i īgai awarim am rava ruāga maiteni, taumi eēga riwa kaua ota babaniei me Job nanare. ⁸ Lamna aubaina, bull 7 ma sipu ororotoi 7 ona vaia ma ona nae au taunola Job awarina ma siai taputapuna ona apui awariu. Tauna aubaimi ina raupari ma ana pari ana nonori da eēga ana vinimalaimi ami kaua apoapoei aubaina. Taumi eēga riwa kaua ota babaniei me au taunola Job nanare.”

⁹ Anina ma Eliphas, Bildad ma Zophar BADA ai-wai i ririweia nanare i kauei, ma BADA Job ana pari i nonori.

✖ **42:3:** Job 38:2 ✖ **42:4:** Job 38:3

¹⁰ *Ma maranai Job i raupari-vorovei, BADA ana maura i veremelei ma raviai-tepatepani. ¹¹ Varevareina ma novunovuna ma ana rava waduwaduboi i nei ana au numa ma maiteni i am ma i uma gogona. Ma Job i vinuaubai aubaina BADA vita āeāgaena Job i verei. Ma taui anatapui kampa i āeāgeta mane ma loji goldei Job i verei.

¹² BADA, Job i viaiaina-kauei ēga me au naonei. Awarina sipu 14,000; kamel 6,000; uata bullna 2,000 ma donki waivine 1,000. ¹³ Ma nanare, natunatuna nelarai seven ma waivinei tonuāa. ¹⁴ Natuna wavinenā magurina wavana Jemimah*, ma keikeina wavana Keziah† ma vitonuina Keren-Hapuk. ‡ ¹⁵ Job natunatuna guguinii inanai i ai dewadewa ēga me guguini āelaui nai au dobuna. Ma Job natunatuna nelarai ma waivinei ai buderī i terei da anatapui ruvana tagogina ina vaia.

¹⁶ Job i mae madeāa 140 āelauna; da āoāgōgana ma nonoina da i nae kimta au ^vi-4-nainanai. ¹⁷ Anina ma i magura kaua ma īrage.

* **42:10:** Job 1:1-3 * **42:14:** Heb. wei wavana anona Gabubu

† **42:14:** Heb. wei wavana anona Cassia. bo kaidara talana.

‡ **42:14:** Heb. wei wavana anona mata penitana.

Wedau Mark
The Gospel of Mark in the Wedau Language of Papua
New Guinea
Buk Mak long tokples Wedau long Niugini

copyright © 2010 Wycliffe Bible Translators, Inc.

Language: Wedau

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-08-30

PDF generated using Haiola and XeLaTeX on 11 Nov 2022 from source files
dated 9 Oct 2020

aa19f3e3-98fb-51fa-9c53-3906edc75f11